

Արտակ Ս. Սարգսյան

**ԱՍՈՐԵՍՏԱՆԻ ԱՐՔԱ ԹՈՒԿՈՒԼԹԻ–
ՆԻՆՈՒՐՏԱ Ի-Ի (Ք. Ա. 1243–1207 ԹԹ.)
ԱՐՇԱՎԱՆ-ՔԸ ԿՈՒՏԻ, ՇՈՒԲԱՐԻ ԵՎ ՆԱԻՐԻ***

Բանալի բառեր–Նաիրի երկրներ, Կուտի երկիր, Շուբարի երկիր, Նիխրիյայի ճակատամարտ, Կատունլսի (Կադմյան ծավղեք), Ալզի-Աղծնիք, Տերուրզի-Դերսիմ, Հայասա-Ազզի, Մուզուրի լեռներ, Եփրատի ավազան, Մական (Մագնանա, Մաչկան), Վերին ծով, Մուարու-Արիննի (Միջաս, Արին):

Իր գահակալության առաջին տարում¹ Ասորեստանի արքա Թուկուլթի-Նինուրտա Ի-ի կուտիների, շուբարեցիների և Նաիրի երկրներ կատարած արշավանքի երթուղին դեռևս ամբողջապես հստակեցված չէ²: Այդ արշավանքի վերաբերյալ Թուկուլթի-Նինուրտա Ի-ը թողել է շուրջ երկու տասնյակ արձանագրություններ³, որոնց տեղեկությունների համադրությունը, ընդհանուր առմամբ, արշավանքի իրադարձությունները պատկերում է հետևյալ կերպ. կառավարման առաջին տարում Թուկուլթի-Նինուրտա Ի-ը Թուլսինա⁴ լեռներից Ստորին Զաբի ավազանով արշավում է Շասիլա-Մաշխաթ-շարրի⁵

*Հոդվածն ընդունվել է տպագրության 16.05.2019:

¹ Թուկուլթի-Նինուրտա Ի-ը գահակալել է Ք. ա. 1243–1207 կամ 1233–1197 թթ. (տես **Streck M.**, *Reallexikon der Assyriologie und Vorderasiatischen Archäologie*, De Gruyter, 2014–2016, էջ 176):

² Խնդրին անդրադարձել են բազմաթիվ ուսումնասիրողներ (**Forrer E.**, *Reallexikon der Assyriologie*, I, Berlin und Leipzig, 1928, էջ 268–271, **Ադոնց Ն.**, Հայաստանի պատմություն, Եր., 1972, էջ 52, **Меликишвили Г.**, *Наири-Урарту*, (Н-У), Тбилиси, 1954, էջ 13–14, **Манандян Я.**, О некоторых проблемах истории и географии древней Армении, Ереван, 1956, էջ 15–16, **Арутюнян Н.**, Биайнили (Урарту), Ереван, 1970, էջ 21–29, **Хачатрян В.**, Хайасцы, ՀՍՍՀ ԳԱ, «Լրաբեր» հաս. գիտ., Եր., 1972, N 8, էջ 32–41, Նույն հեղինակի, *Хайаса и Наири*, ՀՍՍՀ ԳԱ, «Լրաբեր» հաս. գիտ., Եր., 1973, N 11, էջ 37–47, Նույն հեղինակի, *Наири и Армина*, «Լրաբեր» հաս. գիտ., Եր., 1976, 8 (59), էջ 59–72, **Головлева Л.**, Царство Алзи во второй половине II тыс. до н.э., «Древний восток», Ереван, 1978, N 3, էջ 71–87, **Քոսյան Ա.**, Ասորեստանը և Հայկական լեռնաշխարհի երկրները մ.թ.ա XIII դարի երկրորդ կեսին, ՊԲՀ, N 2–3, Եր., 1999, էջ 222–231, Նույն հեղինակի, Մերձավորարևելյան ձգնաժամը և Հայկական լեռնաշխարհը, Եր., 1999, էջ 19–20, 73–76, 155–157, **Սարգսյան Գ.**, Դայանի-Դիաուլսի պետության գրաված տարածքը և քնակչության հայկական ծագումը, «Լրաբեր» հաս. գիտ., Եր., 2003, N 2, էջ 168–170, **Paiva D.**, A expansão meso-assíria no reinado de Tukulti-Ninurta I, (Dissertação de Mestrado em História-Especialização em Civilizações do Médio Oriente e Ásia Antiga), 2012, **Streck M.**, *Reallexikon der Assyriologie*, էջ 176–178 և ուրիշներ):

³ Տես **Grayson A.**, *Assyrian Rulers of the third and second millennia BC (to 1115 BC)*, (The Royal inscriptions of Mesopotamia. Assyrian periods, v. 1), University of Toronto Press, 1987, Printed in Canada, Reprinted 2002, 1–10, 13, 16, 18, 20–21, 23–24, 26, 1001 էջ 231–292: **Дьяконов И.**, *Ассиро-вавилонские источники по истории Урарту*, (АВИИУ), ВДИ, N 2, 1951, 3–9:

⁴ Ի. Դյակոնովը այս քաղաքը հիշատակում է Դարսինա տարբերակով (տես, օր. АВИИУ, 4),

⁵ Ի. Դյակոնովը այս քաղաքը հիշատակում է Բարնանիշ տարբերակով (տես, օր. АВИИУ, 4):

քաղաքներ-Սուկուշկի-Լալար լեռներ երթուղով՝ դեպի Կուտի ընդարձակ երկիրը: Այստեղ, Յաուրի (յաուրիների) լեռներում⁶, ասորեստանցիները բախվում են բաբելոնացիների (տարբերակ՝ կուտիների)⁷ և ուկունանցիների հետ և նրանց հաղթում: Այնուհետև Թուկուլթի-Նինուրտա I-ը գրավում է վերջիններիս բազմաթիվ բնակավայրերը, գերում Ուկունանիի արքա Աբու-լեին և նրանց իշխաններին, տանում Աշշուր, հավատարմության երդում ստանում, վերադարձնում իրենց երկիրը՝ դարձնելով հարկատու⁸:

Շարունակելով առաջխաղացումը՝ արքան գրավում է Էլխունիա և Շար-նիդա երկրները՝ մինչև Մելարի⁹: Այստեղ կուտիների հնազանդեցված զինվորների միջոցով կտրել է տալիս մեծ գերաններ և Մելարիից տեղափոխում Աշշուր՝ իր նոր պալատի կառուցման համար¹⁰: Այնուհետև, ասորեստանցիները տիրանում են նաև Բաբելոն (Պապլոս) երկրին՝ ողջ ընդարձակ Կուտի երկիրը համարելով գրավված¹¹:

Նույն տարում Թուկուլթի-Նինուրտա I-ը մտնում է Կատմուխի՝ պատճառաբանելով, որ այս երկրի 4 քաղաքները հարստանում են իրենց տարածքն ու ժողովրդին թալանելով: Հարվածում է նրանց բնակավայրերին ու սրբավայրերին, գրավում ողջ երկիրը, գերում նրանց իշխանավորներին: Ողջ Շուբարին, Քաշիյարիի ամբողջ շրջանը մինչև Ալգի (Իլգի), որ դեռ Սալմանասար I-ի ժամանակից դադարել էին հնազանդվել, միավորել էին իրենց ուժերը՝ ընդդեմ Թուկուլթի-Նինուրտա I-ի: Ասորեստանյան զորքն անցնում է Քաշիյարի շրջանը, վերահսկողություն հաստատում և սանձում Շուբարի երկիրը, Ալգի երկիրը ու նրանց դաշնակից թագավորներին¹²: Ըստ հիշատակություններից մեկի՝ Կուտիից հետո ասորեստանյան զորքը գրավել է Քաշիյարի լեռների ողջ շրջանը մինչև Կումմուխու երկիրը¹³: Քաշիյարիից և Կատմուխիից ասորեստանյան զորքերը Ալգի են շարժվում Մումմի և Բուշշե (Պուշշե) երկրներով¹⁴, նվաճում Ալգի երկրի չորս հզոր մայրաքաղաքները և Մադանի (Ամադանի) երկրի 6 ամրոցները՝ գերիներին և նրանց գույքը տեղափոխելով Աշշուր: Ճակատամարտում պարտություն կրելով՝ Ալգիի արքա Էլալի-Թեշուբը, իր ծառաների ու որդիների հետ միասին, փախչում է Նաիրի երկիրը, իսկ նրա բանակի մնացորդները, որոնք փախել էին պատերազմից, ապաստան են գտնում լեռներում: Ալգիից ասորեստանյան զորքն անցնում է Մադանի, Նիխանի, Ալայա, Տեբուրգի (Տեպուրգի), Պուրուլումգի (Պուրուլիմգի) երթուղով, հնազանդեցնում այդ երկրները,

6 Ա. Գրեյսոնի մոտ տրանսկրիպցիայի մեջ ակնհայտորեն երևում է Յաուրիի հիշատակությունը (Grayson A., Assyrian Rulers..., 23, էջ 272), սակայն անգլերեն թարգմանության մեջ այն բացակայում է: Ի. Գյակոնովի մոտ այս հատվածի թարգմանությունը հստակ է (АВНИУ, 6):

7 Տե՛ս Grayson A., Assyrian Rulers..., 23, էջ 272: Նույն տեղում, 24, էջ 275-276: АВНИУ, 6: АВНИУ, 6, 7:

8 Տե՛ս նույն տեղում, 1, էջ 234-237:

9 Տե՛ս նույն տեղում, 24, էջ 275-276: АВНИУ, 7: Այս հիշատակությունը կրկնվում են նաև այլ արձանագրություններում:

10 Տե՛ս նույն տեղում, 1, էջ 235:

11 Տե՛ս Grayson A., Assyrian Rulers..., 24, էջ 275-276: АВНИУ, 7: Հիշատակությունները փաստում են, որ Յաուրի լեռներում ասորեստանցիները բախվել են կուտիական երկրներ Բաբելոնի և Ուկունանիի միացյալ զորքի հետ: Հաղթելուց հետո, ասորեստանցիները շարժվել են հյուսիս՝ մինչև Էլխունիա, Շարնիդա, Մելարի և մտել նաև Բաբելոն, այնուհետ՝ Կատմուխի:

12 Տե՛ս Grayson A., Assyrian Rulers..., 1, էջ 235-236:

13 Տե՛ս նույն տեղում, 9, էջ 251: Арутюнян Н., Биаинили (Урарту), էջ 25-26:

14 Քաշիյարիի շրջան ասորեստանցիները մտել են Կատմուխիից, իսկ Ալգի են հասել Կատմուխի-Մումմի-Բուշշե երթուղով: Սա ցույց է տալիս, որ Քաշիյարիից ասորեստանցիները վերադարձել են Կատմուխի, այնուհետև շարժվել Ալգիի ուղղությամբ:

ավերում 180 քաղաքներ, նրանցից պատանդներ վերցնում. այսպիսով գրավում է ողջ Շուբարի ընդարձակ երկիրը և կցում իր երկրին: Պուրուլումզիում նա գրավում է այդ երկրի պաշտամունքային մեծ կենտրոնը, կենդանի այրում բնակիչներին և գերի վերցնում նրանց բանակի մնացորդները¹⁵:

Պուրուլումզիից Աշշուրի զորքերը հաղթահարում են ինչ-որ դժվարանց անհայտ լեռներ և մտնում հեռավոր Նաիրիի երկրների տարածք¹⁶, հասնում Եփրատի ավազան¹⁷, գրավում Ագալգի (Ացալգի) և Շեբարդի (Շեպարդի) երկրները՝ կցելով իրենց երկրին¹⁸, հասնում են մինչև Մական երկրի սահմանը¹⁹, հնազանդեցնում և հարկատու դարձնում նաև Վերին ծովի ափին ընկած ինչ-որ երկրներ²⁰: Նաիրիի երկրների 40 (43) արքաները միացյալ բանակով ձակատամարտում են ասորեստանցիների դեմ²¹, պարտություն կրում, գերվում, տեղափոխվում Էկուր մեծ լեռան սրբավայրը, հնազանդություն հայտնում՝ դառնալով հարկատու²²: Ասորեստանի հարկատու երկրներից էին նաև Դամնաուշը, Արիննան, Բիրիտուն²³: Արշավանքի ընթացքում ասորեստանյան զորքերը մտնում են նաև բուն խեթական տարածքները և

15 Տես **Grayson A.**, *Assyrian Rulers...*, 1, էջ 236:

16 Տես նույն տեղում, 5, էջ 244:

17 Արձանագրություններում մի քանի անգամ հիշատակվում է, որ ասորեստանյան զորքերը հասել են Եփրատի ավազան՝ մեկ դեպքում ողջ Շուբարին գրավելուց հետո (տես **Grayson A.**, *Assyrian Rulers...*, 9, էջ 251), այլ դեպքերում՝ Շուբարիից հետո՝ Նաիրիի և Մական երկրի հետ միասին (տես նույն տեղում, 1, էջ 234-237, 2, էջ 240, 8, էջ 250, 10, էջ 252), երրորդ պարագայում՝ Խաթթիի տարածք ներխուժելու ժամանակ (տես նույն տեղում, 23, էջ 272, 24, էջ 275-276: **АВВИУ**, 6, 7): Ստացվում է, որ ասորեստանցիները երկու տարբեր հատվածներում են հասել Եփրատը՝ մեկը Շուբարին գրավելուց հետո՝ Նաիրի ներխուժելով, մյուսը, հավանաբար, Նաիրիից վերադառնալու ճանապարհին՝ Խաթթի ներխուժելով:

18 Տես **Grayson A.**, *Assyrian Rulers...*, 6, էջ 247, 18, էջ 266: **АВВИУ**, 5:

19 Մական երկրի սահմանը հասնելու վկայությունը մշտապես հիշատակվում է Նաիրիից հետո, հաճախ, որպես նվաճումների վերջնագիծ (**Grayson A.**, *Assyrian Rulers...*, 1, էջ 237, 2, էջ 240, 3, էջ 241, 8, էջ 250): Օր., բանաձևումներից մեկում նշվում է «...կործանողը Կուտիի իշխաններին մինչև Մելսի երկիրը, ցրողը Շուբարի երկրի ուժերի և հեռավոր Նաիրի երկրների մինչև Մական երկրի սահմանը...» (նույն տեղում, 13, էջ 257, 16, էջ 262):

20 Հիշատակություններից մեկում Թուկուլթի-Նինուրտա 1-ը նշում է, որ Աշշուր քաղաքում մշտապես ստացել է Նաիրիի 40 երկրների և Վերին ծովի ափին ընկած երկրների կանոնավոր հարկը (տես **Grayson A.**, *Assyrian Rulers...*, 4, էջ 243): Մեկ այլ արձանագրությունում Աշշուրի տիրակալն իրեն կոչում է «...Վերին և Սուորի ծովերի արքա...Շուբարի երկրի, Կուտիի և Նաիրիի բոլոր երկրների արքա...» (նույն տեղում, 5, էջ 244): Մեկ այլ տեղ Ասորեստանի արքան նշում է, որ Աշշուրն իրեն ուղարկել է Նաիրի երկրները և Վերին ծովի ափի երկրները: «Նաիրիի բոլոր երկրները և երկրները, որ գտնվում են ափին (.....) Վերին ծովի», նա հաղթել է, ենթարկել իրեն, դարձրել հարկատու և նրանց ընծաները ստացել Աշշուր քաղաքում (նույն տեղում, 26, էջ 279: **АВВИУ**, 9): Նաիրի երկրի, Մական երկրի և Վերին ծովի հիշատակությունների տրամաբանությունը ցույց է տալիս, որ Մական երկիրը, ամենայն հավանականությամբ, Վերին ծովի ափին էր և Ասորեստանի արքան հասել էր այդ երկրի հարավային սահմանին՝ սպառնալով Վերին ծովի ափի երկրներին: Վերջիններս, հավանաբար, խուսափելով ներխուժումից, հնազանդություն են հայտնել՝ դառնալով հարկատու:

21 Տես **Grayson A.**, *Assyrian Rulers...*, 5, էջ 244, **АВВИУ**, 3: Ի. Դյակոնովը Նաիրիի արքաների թիվը 43 է նշում. (**АВВИУ**, 3, 5, 6, 7), իսկ է. Վեյդները՝ 40 (տես **Арутюнян Н.**, *Виаинили* (Урарту), էջ 25, ծան. 59). այդ տեսակետին է նաև Ա. Գրեյսոնը:

22 Տես **Grayson A.**, *Assyrian Rulers...*, 23, էջ 272:

23 Տես նույն տեղում, 23, էջ 272: **АВВИУ**, 6: **Դամնաուշը** նույնական է ավելի ուշ հիշատակվող Դամդամուսային՝ Ամիդից հարավ-արևելք (**Սարգսյան Ա.**, Արդինի-Մուսասիրի տեղորոշման շուրջ, ՄՄԱՄԺ, XIX, եր., 2000, էջ 141, ծան. 28): **Արիննի** երկիրը Ուրուարիի կենտրոն Մուսուրու երկիրն է՝ Արինու մայրաքաղաքով, որը ընդգրկում էր Սեկի Միջոս գավառը՝ մերձակա տարածքներով, գուցե և ողջ Սեկը (**Սարգսյան Ա.**, Արդինի-Մուսասիրի տեղորոշման շուրջ, էջ 140-152): Արինու քաղաքը գտնվում էր Խարուսա-Աննու լեռան փեշերին. Թալա-Թաղից (ժամանակակից՝ Շատախ) ոչ հեռու: Այն համադրելի է Արին բնակավայրին, որը, ըստ 1910 թ. կազմված Բիրտանական տոպոգրաֆիական քարտեզի, գտնվում է Աննու լեռան հարավային փեշերին. Շատախ գետի աջ ափին: Այն կարող էր լինել նաև Միջոս բնակավայրը, որը այդ շրջանում հնարավոր է կոչվեր Արինու: Հետաքրքիր է, որ Արինից հարավ, Շատախ գետի ձախակողմյան վտակներից մեկի ճյուղավորումը կրում է Մասարու չայ անունը, որը, հավանաբար, ժառանգվել է Մուսուրուից: **Բիրիտուն**, հավանաբար, ավելի ուշ հիշատակվող Նիրտուն է՝ Տեղրիտի շրջանում. Տիգրիսի միջին հոսանքում (**АВВИУ**, 6 (ծան. 9)):

«Եփրատի այն կողմից»²⁴ գերում 28.800 խեթական ռազմիկների²⁵: Այս նվաճումների արդյունքում Թուկուլթի-Նինուրտա I-ը իրեն համարում է «...Վերին և Ստորին ծովերի արքա...Շուբարի երկրի, Կուտիի և Նաիրիի բոլոր երկրների արքա...»²⁶, ինչպես նաև «...կուտիների կառավարիչներին կործանող, շուբարեցիների և Նաիրի երկրներին վանող արքա...»²⁷:

Արշավանքի երթուղու վերաբերյալ ուսումնասիրողները հանգել են երկու ընդհանրական մոտեցումների: **Ըստ առաջին մոտեցման՝ ասորեստանյան զորքը հասել է Արմ. Տիգրիսի ավազան և հաղթահարել Հայկական Տավրոսի գիծը՝ շարժվելով հյուսիս**²⁸: **Ըստ երկրորդ մոտեցման՝ Արմ. Տիգրիսի վերին ավազանից ասորեստանյան բանակը շարժվել է դեպի արևելք, Վանա լճի հարավային շրջաններով հասել Մեծ Զաբի վերին ավազան, Զագրոսյան լեռներով իջել հարավ՝ վերադառնալով Ասորեստան**²⁹:

Այս մոտեցումներում հատկապես խնդրահարույց է Նաիրիի տեղադրությունը, որի շուրջ ուսումնասիրողները հանգել են երկու հիմնական տեսակետների՝ 1. Նաիրին տեղադրելով Վանա լճի ավազանում՝ վերջինիս և Ուրմիա լճի միջև³⁰, 2. Նաիրին տեղադրելով ծովից ուսումնասիրողները հիշատակում են Հայասա-Ազգի երկիրը³¹:

24 Ա. Գրեյսոնը նշում է «Սիրիայից», միաժամանակ փաստելով, որ արձանագրությունում բառացի գրված է «Եփրատի այն կողմից» (Grayson A., Assyrian Rulers..., 23, 24, էջ 272, 275):

25 Տե՛ս նույն տեղում, 23, էջ 272: АВИИУ, 6:

26 Նույն տեղում, 5, էջ 244:

27 АВИИУ, 8:

28 Այս տեսակետին են, օր., է. Ֆորրերը, Ի. Դյակոնովը, Վ. Խաչատրյանը, Գ. Սարգսյանը:

29 Ն. Հարությունյանը, օրինակ, գտնում է, որ Թուկուլթի-Նինուրտա I-ի զորքերը սկզբնապես անցել են Մոսուլ-Ջախտ ճանապարհով, գետանցել Արևելյան Խարուրը, ճամփա բռնել հյուսիս՝ Ջեզիրե, Շերախ, Էրուխ գծով՝ մինչև Բոհոտան գետը: Այնուհետև, հավանաբար, շարժվել են հարավ-արևմուտք, գետանցել Տիգրիսը, այդ գետի աջափնյակով իջել են հարավ և Գերջուշ-Միդյատ-Մավուր ճանապարհով հայտնվել Մարդինում: Այստեղից ասորեստանյան զորքը, հնարավոր է, շարունակել է ճանապարհը հյուսիս-արևմուտք, մինչև Դիարբեքիր: Այնուհետև, գետանցելով Տիգրիսը, Սիլվան-Գարգան-Բիթլիս ճանապարհով և Վանա լճի հարավային մասերով, նրանք հասել են մինչև Խոշաբ, իսկ այդտեղից Բաշկալայով, Գևարով, Շամիդիանտով և լեռնային Զագրոսի կիրճերով հասել Ուշնու: Արշավանքի վերջնամասը, ըստ նույն հեղինակի, հավանաբար, անցել է Սակիզով՝ Ուրմիա լճի հարավային մասը: Այս մոտեցմամբ, Նաիրին տեղակայվում է Վանա լճի ավազանում՝ տարածվելով նրանից արևելք՝ մինչև Ուրմիայի արևմտյան ափերը: Ինչ վերաբերում է Քաշիյարիին, Կունուխուին (Կունագենե), ապա ենթադրվում է, որ դրանք կարող էր գրավել ասորեստանյան այլ զորաջոկատ: Այն կարող էր անջատվել դեպի Նաիրի արշավող հիմնական ուժերից, Կունուխուն գրավելուց հետո, շարժվել հյուսիս-արևելք և Տիգրիսի ակունքների մոտակայքում միանալ հիմնական ուժերին՝ Նաիրին գրավելու նպատակով (Арутюнян Н., Бнайнили (Урарту), էջ 25-26):

30 Անձվագն Թիգլաթպալասար I-ի (Ք.ա. 1114-1077 թթ.) ժամանակից սկսած՝ Նաիրի անունով բնորոշվել է գրեթե ողջ Հայկական լեռնաշխարհը՝ Մեծ Զաբի վերին շրջանից մինչև Տայք, Բարձր Հայք, Մալաթիա և Հյուսիսային Միջագետք՝ կենտրոնում ունենալով Վանա լիճը, հարավում՝ Ուրմիա լիճը: Ուրարտուի տիրակալներն իրենց ամվանում էին նաև Նաիրիի արքաներ: Նեղ առումով, Նաիրին՝ հնագույն Խաբլիի տարածքում՝ Ք.ա. IX-VII դդ. ձևավորված Խուրուշկայի թագավորությունն էր՝ համանուն մայրաքաղաքով (հավանաբար, համապատասխանում է Ջուլամերկին): Այս հանգամանքներից ելնելով, բազմաթիվ ուսումնասիրողներ Թուկուլթի-Նինուրտա I-ի հիշատակած Նաիրին ևս տեղադրել են Վանա և Ուրմիա լճերի միջևտարածքում (Մելիքիշվիլի Գ., Հարությունյան Ն., Պալիա Դ., Ստրեք Մ. և ուրիշներ):

31 Է. Ֆորրերը Թուկուլթի-Նինուրտա I-ի հիշատակած Նաիրին տեղակայում է Իշուվա-Շուփուում Արածանիի հովտում: Ըստ Ի. Դյակոնովի՝ ասորեստանյան վաղ շրջանի աղբյուրներում «Նաիրի երկրների» ներքո հասկացվել են Հայկական Տավրոսից հյուսիս ընկած ցեղերը, իսկ ուշ շրջանի հիշատակություններում՝ Տիգրիսի վերին ավազանի երկրները, նույնիսկ՝ բուն ասորեստանյան տարածքներից արևելք ընկած շրջանները (АВИИУ, 3, ծան. 8): Վ. Խաչատրյանը Նաիրին նույնական է համարում Հայասա-Ազգի պետության հետ՝ տեղադրելով Հայկական Տավրոսից և Վանա լճից հյուսիս: Գ. Սարգսյանը գտնում է, որ Նաիրի գեղամիության տարածքը հյուսիսում հասել է մինչև Սև ծով, հարավում՝ Արածանի գետ, արևելքում՝ Ճորոխ գետի ավազան, արևմուտքում՝ վերին Եփրատ (Մալաթիայի դիմաց):

Արշավանքի երթուղին հստակեցնելու համար անդրադառնանք հիշատակվող տեղավայրերի տեղադրությանը:

Ուկումանի-Կումանի երկիրը գտնվում էր Խեզիլ և Արլ. Խարուր գետերի միջև՝ ընդգրկելով նաև Մ. Ջաբի՝ Ամադիայից հարավ ընկած որոշ տարածքներ: Նրա թագավորական քաղաքը Կիպչունա-Գեֆշեն էր: Կրոնական կենտրոններից էր Կումմե-Կումմենու՝ ներկայիս Կումանա բնակավայրը՝ Վերին Ջաբի աջափնյակում, Ամադիայից 9 կմ հարավ-արևելք³²: Ուկումանի-Կումանի երկրի հյուսիսային սահմանը, հավանաբար, հասնում էր մինչև Մեխրի, որը հայոց Մեհրի-Նար լեռն է³³: Ուկումանեցիները դաշնակցում էին Մուսրու երկրի հետ³⁴, որը համապատասխանում է Մոկքի Միջա (Միջաս) գավառին կամ ողջ Մոկքին³⁵: Ուկումանին և Մուսրուն, հավանաբար, միմյանցից անջատված էին Ներքին Խաբխի երկրով: Կումանիի սահմանը հարում էր նաև Սալուա (ներկայիս՝ Մուլի բնակավայր)³⁶ երկրին³⁷: Այն հյուսիս-արևելքից և արևելքից սահմանակցում էր նաև Խաբխի երկրին³⁸:

Կուտին՝ կուտինների երկիրը, Ք.ա. III հազարամյակից հայտնի Գուտիումի ժառանգորդն էր³⁹: Նեղ առումով Կուտին երկրի կենտրոնական շրջանն էր, լայն առումով՝ այդ կենտրոնական շրջանի՝ քաղաքական իշխանության տարածման արեալը⁴⁰: Բուն Կուտին նույնական է հին հայոց Կորձայք նահանգի կենտրոն Կորդուք, գուցե և Ներքին, Միջին և Վերին Կորդրիք (Տնորիք) գավառներին⁴¹: Ք. ա. 14-9-րդ դդ. հիշատակվող կուտինների երկիրն ընդգրկում էր Մեծ Հայքի Կորձայք, Մոկք նահանգների տարածքը, Աղձնիք աշխարհի արևելյան շրջանները: Այդ տարածքը մոտավորապես համապատասխանում է նույն ժամանակահատվածում հիշատակվող Ուրուատրի ընդարձակ երկրին և նրան մերձակա տարածքներին⁴²: Կուտին հայոց

32 Տե՛ս **Арутюнян Н.**, Топонимика Урарту, (ТУ), Ереван, 1985, էջ 119-120:

33 Տե՛ս ТУ, էջ 143-144:

34 Տե՛ս АВИИУ, 10 (VI, 73):

35 Տե՛ս **Սարգսյան Ա.**, Արդինի-Մուսասիրի տեղորոշման շուրջ, էջ 140-152:

36 Տե՛ս **Манандян Я.**, О некоторых проблемах истории и географии древней Армении, էջ 8:

37 Տե՛ս АВИИУ, II, 12, 21:

38 Տե՛ս նույն տեղում, 21:

39 Նույն տեղում, 1 (ծան. 4): Կուտին ուսումնասիրողները տեղադրում են՝ ա) Կորդվաց լեռների շրջանում, Վանա և Ուրմիա լճերի միջնատարածքում, նույնացնում Կորդուքի և ողջ Կորձայքի հետ, բ) Տիգրիսի, Փոքր Ջաբի, Գիալայի և Մուլեյմանիե լեռների շրջագծած տարածքում, գ) Ջագրոսյան լեռներում՝ ինչ-որ տեղ, դ) Ջագրոսի հյուսիսում, Ուրմիա լճի ավազանում, ե) Հայկական լեռնաշխարհում՝ ընդհանրապես, նույնացնելով շումերական աղբյուրներից հայտնի Արատտա երկրին, Ուրարտուին: Ըստ տեսակետներից մեկի՝ հնագույն գուշակություններում Գուտիում ասելով հասկացվել է Ուրարտուն, Մանա երկիրը, Մեդիան: Կուտի անունը կապում են նաև հայոց «Խույթ» երկրանվան հետ (ամփոփ տես, օրինակ, **Մովսիսյան Ա.**, Բարեկաշտ արքաների աշխարհակալությունը, Եր., 1997, էջ 4, նաև՝ գրականության հղումները (ծան.1-5), էջ 20-21: Նույն հեղինակի, Հայաստանը՝ Քրիստոսից առաջ երրորդ հազարամյակում, Եր., 2005, էջ 43-48, աղբյուրները՝ Հավելվածում, էջ 104-167):

40 Կուտինները հայոց Կորդուքի և Մոկքի հնագույն տերերն էին: Հավանաբար, Ք.ա. III հազարամյակի կեսերին նրանք իրենց իշխանությունն են տարածել Արևմտյան Տիգրիսի ավազանից մինչև Մ. Ջաբի վերին ավազան՝ ծավալվելով հարավ, մինչև Պարսից ծոց: Նրանք մեծ համբավ ունեին Հին Արևելքում, որպես ռազմատենչ ժողովուրդ, որի տիրակալները շուրջ 100 տարի սատեցին նաև Շումերի և Աքքադի գահին: Կուտինները էթնոմշակութային ընդհանրություններ ունեին Հայկական լեռնաշխարհի բնակչության հետ և սեմական հարավի համար ոչ սեմական հյուսիսը երբեմն բնորոշվել է նաև «Կուտինների երկիր»: Հյուսիս արշավելով Միջագետքի տիրակալները բախվում էին հենց այդ հզոր երկրի ու ժողովրդի հետ, որոնց Քսենոփոնը հիշում է «կարդուխներ» անունով:

41 Որ բուն Կուտին Կորդուքն ու Կորդրիքներն են, լավագույնս երևում է «Կուտի»-ից բխող տեղանունների առատությամբ՝ Կորդուք, Կո(ր)դրիք, Ջուդի, Կորտիձայք, Կաղմոսի Տուն: Նույն արմատից է նաև Կաղմուլխի-Կատմուլխի-Կուտմուլխի:

42 Կուտին համապատասխանում է Արատտա-Ուրուատրի-Արարադի երկրին. վերջինս հայոց ազգածնության առասպելի առաջին երկիրն է, ուր Բաբելոնից հյուսիս շարժվելով հաստատվում է Հայկ նահապետը: Եթե նկատի ունենանք, որ հայոց նախահայրն Արարադի երկիրը, որպես ժառանգություն, թողնում է թոռան՝

Կաղմոսի Տունն է, իսկ Կատմուխին, որն ուսումնասիրողների կողմից հաճախ է նույնացվում վերջինիս հետ, ևս կուտիական երկիր էր՝ համապատասխանելով Կաղմյան Ծավդեքին: Այս երկրի անունով ողջ Հայկական լեռնաշխարհն որոշ դեպքերում բնորոշվել է Գուտիում, կուտիների երկիր⁴³: Թուկուլթի-Նինուրտա I-ը Կուտի ասելով նկատի ունի շուբարեցիների երկրից արևելք, մինչև Արևելյան Խաբուրի և Վերին Ջաբի ավազանն ընկած Կորձայքի շրջանները: Իր գրաված տարածքները նա բնութագրում է որպես կուտիների (ընդհուպ մինչև Մեխրի), շուբարեցիների և Նաիրի երկրներ⁴⁴: Բարխեցիներն ու կուտիները արձանագրություններում համարժեք են հանդես գալիս, Կատմուխին ևս, կարծեք, պատկանում էր կուտիական աշխարհին, սակայն շուբարիական գերիշխանության ներքո էր: Ահա այս երկու միջանկյալ երկրներից արևելք կուտիների շրջանն էր, իսկ դեպի արևմուտք՝ մինչև Եփրատի ավազան, տարածվում էր շուբարեցիների ընդարձակ երկիրը:

Ուկումանին, Կատմուխին, հավանաբար նաև Արիննին, ինչպես նաև Բաբխին դիտվում էին կուտիների ընդարձակածավալ երկրի մաս: Կուտին, ինչպես Շուբարին, ուներ բազմաթիվ արքաներ, կառավարիչներ: Դրանք դաշնակցային միավորներ էին:

Միջին ասորեստանյան աղբյուրներում հիշատակվող **Շուբարի երկիրը** (^{KUR}Subari) ակնհայտորեն շումերական հիշատակությունների Subur^{KI} –ն է, աքքադական ^{KUR}Subartu–ն ավելի ուշ շրջանի ^{KUR}Subre, ^{KUR}Subria, ^{KUR}Subura–ն: Այս երկիրը, ընդհանուր առմամբ, տեղադրվում է Հյուսիսիային Միջագետքում և Հայկական լեռնաշխարհի հարավ–արևմտյան հատվածում: Ըստ որոշ ուսումնասիրողների՝ միջինասորեստանյան աղբյուրների շուբարեցիների տակ պետք է հասկանալ խուռիներին՝ Միտանիի (Խանիգալբատ) բնակիչներին⁴⁵: Իսկ ավելի ուշ շրջանի Շուարիան տեղադրվում է Սասունի լեռներում՝ Ֆումի, Բդիմարի և նրանց հարող շրջաններում⁴⁶: Արտահայտված տեսակետներից մեկի համաձայն՝ շուբարեցիների երկիրը համընկնում է Արատտա, նաև Արմանի(ի/ու)–Արմի/ե երկրների հետ և Հայկական լեռնաշխարհին տրվող անվանումներից մեկն է⁴⁷: Ակնհայտորեն, Սուբուրը հիշատակվում է մինչև Միտանիի գոյությունը՝ Ք.ա. 26-րդ դարից սկսած. կարելի է ենթադրել, որ Միտանի–Խանիբալբատը հետագայում՝ Ք.ա. II

Կաղմոսի Տանը, ամեն ինչ առավել հասկանալի կլինի: Արարադի երկիրը ոչ թե Կորդվաց աշխարհում էր, այլ հենց Կորդուք-Կորձայքն էր: Այստեղ էր տապանակիր լեռը՝ Արարատ-Ջուդի-դաղը: Ակնհայտորեն ունենք աղբյուրներում վկայված հետևյալ պատկերը. շումերական աղբյուրներում Ք.ա. III հազ. սկզբներից հիշատակված Արատտան հետագայում ինչ–ինչ պատճառներով ստանում է Կուտի անունը, որը ընդգրկում էր Կորձայքն ու հարող որոշ տարածքներ: Արատտան Ք.ա. XIII–IX դդ. ասորեստանյան սեպագրերում վերածնվում է Ուրուատրի–Ուրատրի անունով, որը կուտիական երկիր էր: Վերջիններս հայոց միջնադարյան լեռնակները հիշատակում են Արարադի երկիր անունով, որը ժառանգության է հանձնվում Կաղմոսի Տանը: Փաստացի ունենք մի կողմից Արատտա–Ուրուատրի (Ուրատրի)–Արարադ, մյուսից՝ Կուտի (Գուտի)–Կորդուք (Կաղմոսի Տուն, Կորձայք) համընկնումը միևնույն տարածքի համար՝ Մասիուսի և Նպատական լեռներից հյուսիս՝ մինչև Հայկական Տավրոսի գիծը՝ Սիկքի ներառմամբ, և Արևմտյան Տիգրիսի ստորին ավազանից մինչև՝ առնվազն Մ. Ջաբի վերին ավազան:

43 Տես АВИИУ, 49 (309) (ծան. 79):

44 Տես նույն տեղում, 8:

45 Տես АВИИУ, 1 (ծան 6):

46 Տես ТУ, էջ 248–249:

47 Տես **Մովսիսյան Ա.**, Սրբազան լեռնաշխարհը, էջ 40–48: Սուբուր–Սուբարտու երկրի տեղորոշման հարցը՝ նույն հեղինակի, Հայաստանը Քրիստոսից առաջ երրորդ հազարամյակում, էջ 31–32, աղբյուրները՝ Հավելվածում, էջ 104–167:

հազ., տիրացել է Սուրբուր-Սուրբարտուի տարածքին և կոչվել նաև նրա անունով: Իհարկե, դրանից չի բխում, որ շուբարեցիներ ասելով պետք է հասկանալ խուտիներին միայն. այդ անվամբ նշվել է նաև Միտանիի ոչ խուտի բնակչությունը:

Ատրեստանի արքաներ Ադադներարի I-ի (Ք.ա. 1307-1275 թթ.)⁴⁸, Սալմանասար I-ի (Ք.ա. 1274-1245 թթ.)⁴⁹ և Թուկուլթի-Նինուրտա I-ի հիշատակությունների համադրումից ակնհայտ է, որ շուբարեցիները և կուտիները հարևան էին, և նրանց սահմանագիծը Տիգրիսների միախառնման շրջանից արևմուտք էր ձգվում: Շուբարեցիների տիրույթը տարածվում էր մինչև Բարձր Հայք՝ ընդգրկելով Արածանիի ստորին ավազանն ու Սասունի լեռնագավառը: Ավելի հյուսիս Շուբարիի տարածման վերաբերյալ ուղղակի փաստեր չկան: Ծոփքի և Աղձնիքի տարածքներից հյուսիս Հայասա-Ազգի կամ Նաիրիի շրջաններն էին:

Շուբարեցիների երկիրը, այսպիսով, պատմական որոշակի ժամանակաշրջանում, ընդգրկել է Հայկական բարձրավանդակի հետևյալ սահմանագծված տարածքները՝ Մասիուսի լեռներ (Քաշիյարի)-Տիգրիս գետ-Աղձնիք (Ալզի)-Ծոփք (Իսուվա, ներառյալ՝ Դերսիմը (Տերուրզի), Մնձուր և Պաղին գետերի ավազանը (Պուրուլումզի))՝ մինչև Բարձր Հայքի սահմանները (Հայասա-Նաիրի): Հարավում շուբարեցիներ ասելով հասկացվել է նաև Հյուսիսիային Միջագետքը՝ Միտանի-Խանիգալբատի կենտրոնական շրջանները: Այս երկիրը ընդհանրապես կոչվել է նաև Շուբարտու, իր անվանական տարբերակներով: Շուբարեցիների հյուսիս-արևելյան հարևանը՝ Աղձնիք-Մոկք սահմանագծում, Մուսրու երկիրն էր՝ Ուրուատրիի կենտրոնական շրջանը⁵⁰:

Կադուլսի-Կուտմուլսի-Կատմուլսին համապատասխանում է Կադմյան Ծավղեքին⁵¹: Նրա հարավային սահմանն անցնում էր Քաշիյարի-Մասիուսի լեռներով, հյուսիսայինը հասնում էր մինչև Արևմտյան Տիգրիս, արևելքում նրա սահմանը անցնում էր Տիգրիսով⁵²: Կատմուլսին սահմանակից էր Բաբլսի, Ուրուատրի, Ալզի, հավանաբար վերջինիս մեջ մտնող Բուշշե և Մումմի երկրներին, հարավից՝ Քաշիյարի շրջանին (Տուր-Աբդինի լեռներ):

Բաբլսին գտնվում էր Տիգրիսների միախառնման շրջանում⁵³, հավանաբար հասնելով մինչև Արզան-Սղերդ-Կեծանի ավազան սահմանագիծը՝ հյուսիսում, իսկ հարավում ընդգրկելով Կորդուքի հյուսիս-արևմտյան շրջանները: Այս երկիրն ու նրա տարածքն աղբյուրներում դիտվում է ինչպես շուբարիական, այնպես էլ կուտիական և ուրուատրիական:

Շարնիդայի և Էլխունիայի տեղադրությունն անհայտ է: Սակայն հասկանալի է, որ դրանք Կորձայքում՝ կուտիական աշխարհին պատկանող Մեխրի, Բաբլսի, Ուկումանի, Կատմուլսի երկրների մերձակայքում պետք է փնտրել: Չի բացառվում, որ Շարնիդան համապատասխանի Շիրնակին (Շարնախ, Շերնախ, Շերնակ) կամ Շահիդինան դաղին⁵⁴, իսկ Էլխունիան՝

48 Տե՛ս АВИИУ, 1:

49 Տե՛ս նույն տեղում, 2, Հայ ժողովրդի պատմության քրեստոմատիա, հատ. 1 (ՀԺՊԲ), Եր. 1981, էջ 14-15:

50 Տե՛ս Սարգսյան Ա., Արդինի-Մուսասիրի տեղորոշման շուրջ, էջ 140-141:

51 Տե՛ս Հայ ժողովրդի պատմություն, հատ. 1 (ՀԺՊ), պատ. խմբ. Ս. Երեմյան, Եր., 1971, էջ 283 (ծան.7):

52 Տե՛ս ТУ, էջ 98-99:

53 Տե՛ս նույն տեղում, էջ 50-51:

54 Այս լեռները գտնվում են Աղ. Խարբրի վերին հոսանքի և Լևին-սուի միջև, պատմական վերին Կորդրիքի

ժամանակակից էրուհին (էրուխ): Այս երկուսը, ակնհայտորեն, կուտիական երկրներ էին՝ տեղակայված Կորդուքում՝ Մեհրի Նարի մերձակա տարածքներում:

Յաուրի լեռները, որտեղ ասորեստանցիները բախվել են կուտիների (տարբերակ՝ բարխեցիների) և ուկունանեցիների հետ, պետք է փնտրել Կորդուքի և Տնորիքի հարավային սահմաններում, Արևելյան Խաբուրից հարավ, Տիգրիսի և Մեծ Զաբի միջնատարածքում: Ադադներարի I-ի հիշատակություններում յաուրիները հանդես են գալիս կուտիներից, Կատմուխի երկրից, ախլամուններից (արամեացիներից) և սուտիներից հետո⁵⁵, որը հաստատում է մեր մոտավոր տեղադրությունը: Էլխունիա (էրուհ)-Շարնի-դա (Շիրնակ-Շարնախ)՝ Մեխրի (Մեհրի-Նար) սահմանագծին հասնելուց հետո, ասորեստանյան զորքը ներխուժել է Բաբլիս՝ հավանաբար Կորդուքի հյուսիս-արևմտյան շրջանները: Ապահովելով թիկունքն ու Կորդուքի տարածքը հենակետ ունենալով՝ ասորեստանյան զորքերն անցնել են Տիգրիսը, մտել Կատմուխի: Կատմուխին նվաճելուց հետո ասորեստանցիներն անցել են Քաշիյարի լեռների շրջանը: Ապահովելով հարավը և այն դարձնելով հենակետ՝ ասորեստանյան զորքը, այնուհետ, շարժվել է հյուսիս, մտել Բուռնի և Մումմի երկրները: Հաջորդ հարվածն ուղղվում է Ալգի-Աղձնիքին⁵⁶:

Բուռնի (Պուռնի-Պուռնի) և Մումմի երկրների տեղադրությանը գիտության մեջ հստակ լուծում չի տրվել: Բուռնի-Պուռնին Ն. Հարությունյանը համադրում է Շիրվանից հարավ-արևելք գտնվող ժամանակակից Բուշի-Բոշի հետ⁵⁷: Չբացառելով այս տեսակետը՝ առավել հավանական ենք դիտում Բուռնի-Պուռնիի համադրումը Բուշերիկ-Բշերիկի հետ, որը Դիարբեքիի նահանգի գավառներից մեկն էր՝ տեղակայված Մուֆարկին (Սիլվան)⁵⁸ քաղաքից հարավ-արևելք: Բաթման գետը ևս կրում է Բշերիկ անունը: Տիգրիսի ավազանում, Դիարբեքիի գավառի արևելյան և Սասունի Խարզան գավառակի սահմանային մասում, Տիգրիսի աջ ափին տարածվող դաշտավայրը, որը Բշերիկ գավառի տարածքում էր, ևս հայտնի է Բշերիկ անունով⁵⁹: Ներկայումս վերոնշյալ տեղավայրերը հայտնի են Բեշերիկ-Բիշերի տարբերակներով: Բուռնի-Բուշերիկի համադրությունն առավել վստահելի է թվում Մումմի երկրի տեղադրությանը: Հասանելի է հյուսիս-արևմուտք՝ Բաթման և Գարզան (Ղարզան, Խարզան) գետերի միջնատարածքում է գտնվում Մայնունիկ-Մեյնունի բնակավայրը, որը, հավանաբար, Մումմի երկրի ժառանգորդն է⁶⁰: Որ Մումմին գտնվում էր Կատմուխի հարևանությանը, փաստվում է նաև Թուկուլթի-Նինուրտա I-ի ժամանակին վերաբերող տնտեսական մի փաստաթղթով, որտեղ նշվում է Կատմուխի, Մումմե, Արիննի երկրներից ստացված անասնահարկի մասին⁶¹: Մումմեն Բուռնի-Բշերիկի, Կատմուխի-Կադմյան Ծավղեքի, Ալգի-Աղձնիքի, Արիննի-Արիննի (Մոկքում)

և Ճահուկի տարածքներում, Ամադիայից հյուսիս, Մեհրի-Նարից հյուսիս-արևելք, նրանից ոչ հեռու:

55 Տես АВИИУ, 1:

56 Ասորեստանյան աղբյուրների Ալգի-Իլգին համապատասխանում է ուրարտական արձանագրությունների Ալգի(նի)ին, խեթական Ալշենի և հայոց Աղձնիքին (АВИИУ, 3 (ծան. 6), 4 (ծան. 3), ТУ, էջ 18-19:

57 Տես ТУ, էջ 162:

58 Հայտնի է նաև Միֆարկին, հայկ. աղբյուրներում՝ Մուֆարկին, պատմ.՝ Նփրկերտ, Մարտիրոսաց քաղաք անուններով:

59 Տես Հայաստանի և հարակից շրջանների տեղանունների բառարան (ՀՀՇՏԲ), հատ. 1, եր., 1986, էջ 713-714:

60 Տես Սարգսյան Ա., Արդինի-Մուսասիրի տեղորոշման շուրջ, էջ 141:

61 Տես АВИИУ, 3 (ծան. 5):

միջև էր⁶²:

Մուսմե-Մայնունիկից հետո Թուկուլթի-Նինուրտան մեկ դեպքում նշում է Քաշիյարի շրջանի, մեկ այլ դեպքում Ալզի երկրի գրավման մասին: Սակայն այլ արձանագրություններից ակնհայտ է, որ Աշշուրի արքան Կատունիսից հետո է գրավել Քաշիյարին, ապա միայն՝ Մուսմին և Բուշեն, որտեղից էլ շարժվել Ալզի:

Ալզի-Իլզին գիտական գրականության մեջ նույնացվում է Մեծ Հայքի Աղձնիք աշխարհին⁶³: Այս մոտեցմանը պետք է հավելել, որ Ալզին չէր ընդգրկում Աղձնիքի արևելյան և հարավ-արևելյան գավառները: Ասորեստանի արքա Աշշուրբեկական (Ք.ա. 1076-1059 թթ.) Աղձնիքի Ազնվաց ձոր, Տատիկ, Երխեթ, Կեթիկ գավառների տարածքը, Արզան գավառի հարավային և արևելյան շրջանները դիտում է Ուրուատրի երկրի մաս⁶⁴: Թուկուլթի-Նինուրտա I-ը Արզան գավառի հարավ-արևմտյան և հարավային տարածքները դիտում է Բուշեն և Մուսմե երկրների տարածք, որը սակայն չի բացառում նրանց՝ Ալզին պատկանելու հանգամանքը: Թիգլաթպալասար I-ն Աղձնիքի հարավ-արևմտյան շրջանները, մինչև Կեծան գետը դիտում է Բաբլսիի և նրա Խարիա երկրամասի տարածք⁶⁵, որոնք Աշշուրբեկականի մոտ Ուրուատրիին էին պատկանում: Այսպիսով, Ալզի երկիր պետք է դիտել Գարզան (Ղարզան, Խարզան) գետից արևմուտք ընկած Աղձնիքի տարածքները:

Ալզի-Աղձնիքից հետո Թուկուլթի-Նինուրտան մտել է **Մադանի երկիրը**, որը ժամանակակից Մադենն է՝ Տիգրիսի ակունքների շրջանում⁶⁶: Հաջորդ հիշատակվող երկրները Նիխանին և Ալայան են, որոնց տեղադրությունը խնդրահարույց է⁶⁷: **Նիխանին** համադրելի է Բալուից հյուսիս-արևելք գտնվող Նեխրի (Նեխիրի, Ներխի, Նելսի, Նախարի) բնակավայրին, որը Արդանա-Մադեն գավառի Բալու գավառակի բնակավայրերից է⁶⁸, իսկ **Ալայան** համադրելի է Խարբերդի նահանգի Դերսիմ գավառի, Չարսանջակ (Խոզաթ) գավառակի Ալուր բնակավայրին (Ալուր, Հալուր, Հալվորի, Հալվորիկ): Վերջինս գտնվում է Դերսիմից (Թունջելի) հյուսիս-արևմուտք, Խոզաթից հյուսիս-արևելք, Մնծուր գետի աջ ափին⁶⁹: Հաջորդիվ հիշատակվող **Տերուրզի երկիրը** համադրելի է պատմական Դերսիմին⁷⁰: Տերուրզի-Դերսիմ նույնականության օգտին են վկայում Բիթլիսի նահանգի Մուշի գավառի Դերսիմ գյուղի անվանումները՝ Դեսում, Դվըրսըմ, Դվևսըմ, Տերսիմ⁷¹, որոնք Տերուր-

62 Ս. Երեմյանը գտնում է, որ Բուշեն և Մուսմին պետք է փնտրել ինչ-որ տեղ Դիարբեքիի և Հասանբեյի միջև (ՀԺՊ, հատ. 1, էջ 283 (ծան. 7)):

63 Տես ԿՄ, էջ 18-19: Ս. Երեմյանը այն նույնացնում է Անձիտի հետ (ՀԺՊ, հատ. 1, էջ 283 (ծան. 7)):

64 Տես АВИИУ, 19: Արշավանքի երթուղու վերաբերյալ տես **Սարգսյան Ա.**, Արդիսի-Մուսասիրի տեղորոշման շուրջ, էջ 141-142, 146 (տես քարտեզը):

65 Տես АВИИУ, 10 (III, 35):

66 Ս. Երեմյանը (Ա)Մադանին նույնական է դիտում Ամիդ-Դիարբեքիին (ՀԺՊ, հատ. 1, էջ 283 (ծան. 7)):

67 Նիխանի-Նիխանուն մասնագիտական գրականության մեջ ենթադրաբար նույնացվել է ժամանակակից Նիխան դաղի հետ՝ Տիգրիսի աջափնյակում (**Дьяконов И.**, Предыстория армянского народа, (ПАН), Ереван, Издательство АН Армянской ССР, 1968, էջ 227, ծան. 96, ԿՄ, էջ 154-155): Գ. Մելիքիշվիլին Ալայան հակված է նույնացնել ուրարտական արձանագրություններից հայտնի Ալաու(...) շրջանին, որը հանդես է գալիս Ուրմեուլի երկրի և Կուլիմերի քաղաքի հետ (**Меликишвили Г.**, Урартские клинообразные надписи, (УКН), Москва, 1960, էջ 416, ԿՄ, էջ 17):

68 Տես ՀՀՇՏԲ, հատ. 3, Եր., 1991, էջ 974:

69 Տես ՀՀՇՏԲ, հատ. 3, էջ 309: Միջնադարում հանրահայտ էր իր Ս. Կարապետի վանքով: Շրջակայքում կան ոսկու և արծաթի հանքեր, որոնք շահագործվել են հին ժամանակներից:

70 Ս. Երեմյանը Տերուրզին տեղադրում է միջնադարյան Դադիմայի շրջանում (այժմ Դադեն գյուղ) (ՀԺՊ, հատ. 1, էջ 283 (ծան. 7)):

71 Տես ՀՀՇՏԲ, հատ. 2 , Եր., 1988., էջ 94:

զի-Դերսիմ անցումային ձևերն են: Բացի այդ, Տերուրզին, Թեպուրզի ձևով, հիշատակվում է նաև Ք. ա. 14-րդ դարի խեթական աղբյուրներում՝ կապված Թուդխալիյաս III-ի դեմ Իշուվայի (հայկական՝ Ծովք) և խեթական պետության արևելյան շրջանների ապստամբության հետ: Այս իրադարձությունները հիշատակվում են խեթական Սուպլիուլիումաս I արքայի և միտանական Շաթիվազա թագավորի կնքած պայմանագրում. «Խաթթի երկրի մարդիկ գնացին Իշուվա: Գուրտալիսսայի մարդիկ, Արավանայի մարդիկ, Զազաս երկիրը (տարբերակ՝ «Ջազգիսա»), Կալամասնա երկիրը, Թիմնա երկիրը (տարբերակ՝ «Թիմնինա»), լեռնային երկիր Խալիվան, լեռնային երկիր Կարնան, Թուրմիտայի մարդիկ, Ալիսա երկիրը, Խուրմա երկիրը, Խարանա լեռնային երկիրը, Թեգարամնա երկրի կեսը, Թեպուրզիի մարդիկ, Խազգայի մարդիկ և Արմատանա երկրի մարդիկ ապստամբել էին իմ հոր ժամանակ»⁷², - վկայում է Սուպլիուլիումասը: Այս երկրների վերաբերյալ ուսումնասիրողները արտահայտել են տարբեր կարծիքներ: Դրանցից Արավանա-Արաբան-օվասի կամ Արզուվան, Կարնա-Կորան, Զազգիսա-Զազա (Զազա են կոչվում նաև Դերսիմում և Բալույում բնակվող ցեղերից դեյլեմիտների հետնորդները)՝ Թեգարամնա-Թիլ-Գարիմու (Եփրատի և Կյուրիսի միջև) համադրումները⁷³ ևս վերն արտահայտված Տերուրզի (Թեպուրզի)-Դերսիմ նույնականության տեսակետի օգտին են վկայում. Տերուրզի-Թեպուրզին Թեգարամնայի, Իշուվայի, Մադենի, Բալուի և Մնծուրի մերձակայքում էր՝ լավագույնս համընկնելով Դերսիմին:

Դերսիմից Թուկուլթի-Նինուրտա I-ն անցել է Պուրուլումզի, այնուհետ Նաիրի՝ հասնելով Եփրատի ափ: Սա թելադրում է կարծել, որ Պուրուլումզին ընկած էր Դերսիմից հյուսիս՝ մինչև Եփրատ՝ ընդգրկելով Մնծուր (Սզուր, Մուզուր) լեռնագավառը: Սակայն բազմաթիվ արձանագրություններով փաստված է, որ Պուրուլումզին հարևան էր նաև Ալզիին⁷⁴: Ըստ այդմ, կարելի է ենթադրել, որ այն ընդգրկել է ոչ միայն Մնծուր-Մուզուրը, այլև Դերսիմից արևելք ընկած Պադինը (հայոց Պադնատունը), գուցե՛ն՝ Բալահովտի հյուսիսային շրջանները, այսինքն՝ Արածանիի Մնծուր և Պադին վտակների ավազանը՝ հարավում հասնելով մինչև Ադձնիք: «Պուրուլումզի» տեղանունը կարող է պահպանված լինել Պադին (Պադան, Պալին, Պադանական, Պերի) և Մուզուր (Սզուր)-Մնծուր տեղանուններում⁷⁵: Դրանք Դեր-

72 Մեջբերումը ըստ՝ Манандян Я., О некоторых проблемах истории и географии древней Армении, էջ 78:
73 Նույն տեղում, էջ 78-80:

74 Տե՛ս АВИИУ, 5, 10: Grayson A., Assyrian Rulers..., 21, էջ 269: Մասնագետներն այս երկիրը, քնդհանուր առմամբ, տեղադրում են Կադմուսիից հուսիս-արևմուտք, Ալզիի մերձակայքում (ԿՄ, էջ 161-162)՝ նույնացնելով նաև պատմական Անգեղ-տուն գավառին (ՀԺՊ, հատ. 1, էջ 283 (ծան. 7)): Հայկական լեռնաշխարհի մուշկերի ներխուժման մասին հիշատակելով՝ Թիգլթաթալասար I-ը նշում է, որ նրանք գրավել էին Ալզի և Պուրուլումզի երկրները, այնուհետ ներխուժել Կադմուսի: Հաղթություն տանելով նրանց դեմ, արքան Ալզին և Պուրուլումզին ներառել է իր տերության կազմում (АВИИУ, 10): Սա ցուցանում է մուշկերի շարժման հետագիծը. նրանք, հավանաբար, Փոքր Ասիայից գետանցել են Եփրատը և մտել պատմական Ծովքի Մուզուր գավառի տարածք, այնուհետ նույնանուն գետի ավազանով շարժվել պատմական Ծովքի Պադնատուն, այնուհետ՝ Բալահովտ գավառների տարածք և ներխուժել Ադձնիք, որից հետո իջել Կադմյան ծավղեք: Փաստացի Պուրուլումզին հարևան էր Դերսիմին, Ադձնիքին, Նաիրի երկրին և պետք է սահմանակցեր մերձեփրատյան ավազանին, որի աջափնյա տարածքներից մուշկերը կարող էին անմիջապես թափանցել այստեղ: Թուկուլթի-Նինուրտա I-ը, փաստացի գնացել է մուշկերի տեղաշարժի հակառակ ուղղությամբ՝ Կադմյան ծավղեքից անցել Ադձնիք, Դերսիմի վրայով մտել է Մուզուր՝ հասնելով Եփրատի ավազան՝ Կամալի և Երզնկայի հատվածում:

75 «Պուրուլումզին» կարող է լինել Պադին և Մ(ու)զուր տեղանունների հնագույն համակցված տարբերակը: Տեղանունը ակնհայտորեն բարդ բառ է, հավանաբար բաղկացած Պուրուլ+ումզի՝ 2 արմատից: Պուրուլ-ից կարող է բխած լինել Պադ/լ(ին) արմատը, իսկ ումզի-ից, ու-ի դրափոխությամբ՝ Մուզուր-Մնծուրը՝

սիմի հարևանությամբ էին՝ արևելքից և հյուսիսից: Այսպիսով, Թուկուլթի-Նինուրտա I-ը, հավանաբար, հասել է պատմական Բարձր Հայքի հարավային սահմանին, որից հետո բախվել է նաիրցիներին՝ հասնելով մինչև Մական երկրի սահմանը: Աշշուրի զորքերը, հավանաբար, Եփրատի ափ են հասել Երզնկայից (պատմական Երիզա, Արիզա, Արզանկա)⁷⁶ հարավ կամ հարավ-արևմուտք: **Պուրուլումզիի և Նաիրիի** սահմանների հստակեցման հարցում երկու փաստ չափազանց կարևոր է. Թուկուլթի-Նինուրտան նշում է, որ Ալզիի արքան փախել էր Նաիրի: Սա փաստում է, որ Ալզին հյուսիսից հարևան էր ոչ միան Պուրուլումզիին, այլ Նաիրիին: Եվ երկրորդ՝ Ասորեստանի արքան նշում է, որ Պուրուլումզիում գրավել է այդ երկրի պաշտամունքային մեծ կենտրոնը: Արշավանքի երթուղու տրամաբանությունը հուշում է, որ Դերսիմից ասորեստանյան զորքը, հավանաբար, Եփրատի ավազան է դուրս եկել Անի-Կամախի մոտ, գրավել հայկական այս հնագույն ու հռչակավոր սրբավայրը⁷⁷, այնուհետ Եփրատով շարժվել Երզնկայի ուղղությամբ, որտեղ և բախվել է նաիրյան արքաների հետ: Այս տեսանկյունից կարևոր է գտնել Ազալզի, Շեբարդի և Մական երկրների տեղը, որոնք հիշատակվում են Նաիրիին հաջորդիվ: Կարևոր են նաև Նաիրիից հետո **Վերին ծովի** բազմակի հիշատակությունները⁷⁸, հուշելով, որ Աշշուրի զորքը Դերսիմից, Մանուրից և Եփրատի ավազանից, հավանաբար, շարժվել է հյուսիս՝ Սև ծովի ուղղությամբ⁷⁹: Պետք է ենթադրել, որ ասորեստանյան զորքը չի հասել Սև ծով, այլ մոտեցել է նրան մերձակա ինչ-որ երկրի հարավային սահմանին: Եվ այդ երկիրը Մականն է, որի սահմաններին իրոք հասել է Թուկուլթի-Նինուրթա I-ը, սակայն չի նշում, որ մտել է այդ երկրի տարածքը: Կարելի է ենթադրել, որ ասորեստանյան զորքը հասել է Արևելյան Պոնտոսի լեռները, հավանաբար Գյումուշհանեի մոտակայքում: Այս տրամաբանությամբ, **Մական երկիրը** պետք է ընկած լիներ Տրասիզոնի և

Մուզի>Մուզուր>Մզուր>Մանուր անցումով:

76 Երզնկայի անվան տարբերակները տե՛ս ՀՀՇՏԲ, հատ. 2, էջ 235:

77 Հետաքրքիր է, որ Թուկուլթի-Նինուրտան հիշատակում է Կումմուխու գրականության մեջ հիմնականում, նույնացվում է անտիկ Կումագենեին (ՄՄ, էջ 122-123): Մական արձանագրության ձևաչափից այն կարելի է հասկանալ 2 ձևով. 1-ին՝ Կուտիից և Քաշիարիից հետո հիշատակվում է Կումմուխու-Կումագենե. 2-րդ՝ Քաշիարիից հետո նշվում է ոչ թե Կումագենե, այլ Կեմալը, հայասական Կումմախա-Կամուխան՝ Կումմուխու տարբերակով, որը հայոց Կամախն է՝ Արամազդի գլխավոր սրբավայրը: Հետաքրքիր է, որ արձանագրության շարունակության մեջ նշվում է Մադանի, Նիխանի, Ալայա, Տեբուրգի, Պուրուլումզի՝ մինչև Եփրատ հասնելու մասին (**Grayson A.**, *Assyrian Rulers...*, 9, էջ 251), որը, կարծեք, ցուցանում է, թե ասորեստանյան զորքը ինչպես է դուրս եկել Եփրատի ափ, ոչ թե Կումագենեի, այլ՝ Կամախի մոտ: Դերսիմից Վերին Եփրատ հասնելու երկու հավանական ճանապարհ կա, մեկը Մանուրի լեռնանցքով տանում է Կամախ, մյուսը Մանուրի լեռների արևելյան կողմում առկա 2 լեռնանցքներով տանում է Երզնկա: Համենայն դեպս, մինչև Տեբուրգի-Դերսիմ հասնելն ասորեստանյան զորքը չի մտել Պուրուլումզի. դա նշանակում է, որ այդ նշանավոր սրբավայրը Դերսիմից հյուսիս էր:

78 Տե՛ս АВИИУ, 9, **Grayson A.**, *Assyrian Rulers...*, 4, էջ 243, 26, էջ 279

79 Գիտության մեջ տիրապետում է այն կարծիքը, որ Թուկուլթի-Նինուրտա I-ի և Թիգլաթպալասար I-ի հիշատակած Վերին ծովը Վանա լիճն է (տե՛ս, օրինակ, **Ադոնց Ն.**, Հայաստանի պատմություն, էջ 349), որը համոզիչ չէ: Թիգլաթպալասար I-ն իրոք հասել է մինչև Տայք, իսկ Թուկուլթի-Նինուրտա I-ը Դերսիմից և Մանուրից, հավանաբար, անցնել է Բարձր Հայք: Թերևս, նրանք կարող են հասած չլինել ընդհուպ սևծովյան ափ, սակայն ակնհայտորեն գիտեին, որ մտել են կամ մոտեցել են տարածքների, որոնց հյուսիսում Սև ծովն էր: Թիգլաթպալասար I-ը, գրավելով Նաիրին, նշում է «...Նաիրի երկիրը՝ Թումմեից մինչև Դայանեի և Վերին ծով, այլ տարբերակում՝ «...Թումմից մինչև Դայանե...Խաբիսի երկիրը մինչև Մեծ ծովը...»): Թումմեն, որ համապատասխանում է ժամանակակից Թիսումի (Ջուլամերկից 30 կմ հարավ), գտնվում էր Խաբիսի երկրում, Դայանեին Հայոց Տայքն է, որ գտնվում էր Սև ծովից հարավ (այս արշավանքի երթուղու մասին տե՛ս **Սարգսյան Ա.**, Թիգլաթպալասար I-ի մ.թ.ա 1112 թ. նաիրյան արշավանքի երթուղին, ՊԲՀ, 2002, 3 (161), էջ 215-224): Իսկ Թուկուլթի-Նինուրտա I-ը բազմաթիվ անգամ հիշատակում է, որ Նաիրիից հետո հասել է Մական երկրի սահմանը, այլ տարբերակներում՝ մինչև Վերին ծով, որի ափի երկրներին հարկատու է դարձրել:

Գյուժնուհանների կամ Տրապիզոնի ու Սատաղի միջև: Անտիկ շրջանում Տրապիզոնից Սատաղ տանող ճանապարհային կայաններից մեկը, որ մոտ էր Տրապիզոնին, կոչվում էր Մագնանա⁸⁰: Այն, հավանաբար, համապատասխանում է ներկայիս Մաչկան (Մաչկա, Մաչխա) գավառին՝ համանուն կենտրոնով: Մական անունը միանգամայն համադրելի է Մագնանա և Մաչկան տեղանունների: Թե, որքան էր տվյալ ժամանակում Մականի տարածքն իջնում հարավ, դժվար է փաստել: Ինչ վերաբերում է **Ազալզի և Շեբարդի** տեղավայրերին, ապա վերջիններս ևս Նաիրիի տարածքում էին և հիշատակվում են Նաիրի ներխուժելուց հետո: Կարելի է կարծել, որ այս երկու երկրները գտնվում էին Եփրատի և Մականի միջև: Այս մոտեցմամբ Ազալզին կարող է համապատասխանել Արիզա-Երիզա-Երզնկային: Հյուսիս շարժվելով՝ ասորեստանյան զորքը կարող էր դուրս գալ Ս. Գրիգորի լեռնանցքի և Սեպաբար (Սպիկոր) բնակավայրի շրջակայք՝ մոտենալով Արևելյան Պոնտոսի լեռներին: Շեպարդին, կարծում ենք, պետք է փնտրել այս լեռնանցքի մերձակայքում: Փաստացի Թուկուլթի-Նինուրտա I-ն երկու անգամ է դուրս եկել Եփրատի ավազան, ինչպես և նշում է՝ մեկ անգամ Նաիրիի երկրների տարածքում, մյուս դեպքում՝ Խաթթիի տարածք մտնելիս, որտեղից գերել է 28800 խեթական ռազմիկների⁸¹: Ասորեստանի արքան Խաթթիի տարածք կարող էր անցնել կամ Քաշիյարի շրջանը նվաճելուց հետո, մինչև Շուբարի և Նաիրի արշավելը՝ կանխելու համար խեթերի աջակցությունը նրանց, կամ Շուբարին և Նաիրին գրավելուց հետո՝ կանխելով վերջիններիս աջակցությունը խեթերին: Մական երկրի սահմանը հասնելուց հետո, ասորեստանյան զորքը, ապահովության համար, կարծում ենք վերադարձել է գրեթե նույն ճանապարհով: Հասնելով Դերսիմ՝ նրանք Բերդակ-Խարբերդ-Տոմիս երթուղով կարող էին գետնանցել Եփրատը և վերադառնալ Ասորեստան:

Անհայտորեն ասորեստանյան այս արքայի արձանագրություններում հիշատակվող Նաիրին Վանա և Ուրմիա լճերի ավազանում չէր, այլ Վերին Եփրատի ավազանում՝ Բարձր Հայքի տարածքում⁸², հավանաբար հյուսիսում հասնելով մինչև Արևելյան Պոնտոսի լեռները՝ ժամանակակից Մաչկանից հարավ, իսկ հարավում՝ Մնձուր (Մզուր, Մուզուր), և Պաղինի ու Բալուի արևելյան սահմաններով ձգվել մինչև Աղձնիք:

Նկատենք նաև, որ խեթա-ասորեստանյան Նիխրիյայի հայտնի ձակատամարտը տեղի է ունեցել Թուկուլթի-Նինուրտա I-ի նույն այս արշավանքի ընթացքում: Չնայած այստեղ Նիխրիյայի ձակատամարտն անվանապես չի հիշատակվում, սակայն այս արքայի տարեգրություններում Խաթթիի

80 Տե՛ս **Ադոնց Ն.**, Հայաստանը Հուստինիանոսի դարաշրջանում, Եր., 1987, էջ 117 (ծան.2):

81 Պետք է նկատի ունենալ մեկ այլ սցենար ևս: Հնարավոր է, որ Թուկուլթի-Նինուրտա I-ը Եփրատ ասելով նկատի ունի Արածանին, և զորքի առաջխաղացումը սահմանափակված լինի Արածանիի և Վերին Եփրատի միջնատարածքով: Աշուրի արքան հնարավոր է չափազանցել է իր ձեռքբերումները: Ինչպես ուսումնասիրողները նկատել են (օր. Ա. Քոսյանը), 28800 գերված ռազմիկների թիվը նրա հոր՝ Սալմանասար I-ի գերած խանիգալթայան ռազմիկների թվի (14400) կրկնակին է: Բացի այդ, Շուբարի-Խանգալթատի ավերած 180 բնակավայրերի մասին նշում է նաև Սալմանասար I-ը, և որդին կարծեք փորձում է կրկնել ու բազմապատկել հոր վերանքները:

82 «Նաիրյան երկրներ» ասելով Թուկուլթի-Նինուրտա I-ը, հավանաբար, նկատի է ունեցել Հայաս-Ազգին, որը թույլ կենտրոնացված պետություն էր, և նրա տեղական կառավարիչները կարող էին դիտվել որպես արքաներ: Նրա հաջորդներից Թիգլաթպալասար I-ը և ներխուժել էր Բարձր Հայքի տարածք և այն դիտում էր նաիրյան երկրամաս (**Մարգսյան Ա.**, Թիգլաթպալասար I-ի մ.թ.ա. 1112 թվականի նաիրյան արշավանքի երթուղին, էջ 221, ծան. 58):

տարածք ասորեստանյան զորքի ներխուժման մասին որևէ այլ վկայության բացակայությունը թույլ է տվել այս իրադարձությունը համադրելու Թուկուլթի-Նինուրտա I-ի՝ Ուգարիտի արքա Ամնուրապիին ուղղված նամակում հիշատակվող Նիխրիյայի ճակատամարտի հետ⁸³:

Նիխրիյայի ճակատամարտի մասին տեղեկություններ կան նաև խեթական աղբյուրներում՝ Իսուվայի արքային ուղղված Թուդխալիյաս IV-ի նամակում: Ըստ այդ աղբյուրների՝ ասորեստանյան զորքի առաջխաղացումը կանխելու նպատակով խեթերն իրենք են նախահարձակ եղել՝ փորձելով թիկունքից հարվածել ասորեստանյան ուժերին⁸⁴: Արշավանքը ծրագրված էր կազմակերպել կախյալ Իսուվայի հետ համատեղ: Ինչպես հայտնի է Ուգարիտյան նամակից, Խաթթի արքա Թուդխալիյաս IV-ը վերջնագիր է ներկայացնում Ասորեստանին, միաժամանակ խեթական զորքը մտնում է Նիխրիյա: Հավանաբար Ասորեստանի արքան ինքն է նպատակ ունեցել գրավելու Նիխրիյան: Ուգարիտյան նամակում հաղորդվում է, որ երբ խեթական զորքը մտել է քաղաք, Թուկուլթի-Նինուրտան իր զորքը Նիխրիյայի մոտից հետ է քաշել Սուրբա քաղաքը⁸⁵ հավանաբար պատրաստվելու վճռական ճակատամարտի: Սակայն երբ խեթական զորքը Նիխրիյայում բախվում է ասորեստանցիների հետ, Իսուվայի արքան չի ժամանում ճակատամարտի վայր՝ նախապես բանակցություն վարելով հակախեթական ինչ-որ ուժերի հետ⁸⁶: Թուկուլթի-Նինուրտա I-ը հաղթում է, որից հետո անցնելով Եփրատը, ասպատակում խեթական սահմանամերձ շրջանները: Արդյունքում, ինչպես ենթադրվում է, խեթերի հսկողության տակից դուրս են գալիս ռազմավարական և տնտեսական մեծ նշանակություն ունեցող Ալզին և Իսուվան⁸⁷:

Նիխրիյան ուսումնասիրողների կողմից տեղադրվել է Խաբուրի կամ Բալիխի վերին հոսանքի շրջանում, Վերին Տիգրիսի հովտում⁸⁸, նույնացվել է Էգիլի⁸⁹ (հայկ.՝ Անգղ) կամ Նփրկերտի հետ⁹⁰: Ուրարտական աղբյուրների Նիխրիանին Արմե երկրի կենտրոնն էր⁹¹, իսկ Արմեն, ակնհայտորեն, ընդգրկում էր ներկայիս Միլվանի (պատմ.՝ Նփրկերտ) տարածքը, նաև Սասունի լեռնագավառը⁹²: Արմե երկիրը Ալզի-Աղձնիքի տարածքում էր⁹³: Իսկ Թուկուլթի-Նինուրտա I-ը Միումե-Մայմունիկից հետո, անկասկած, շարժվել է հյուսիս-արևմուտք. ահա Բաթմանի միջին հոսանքում, Նփրկերտի մոտակայքում նա կարող էր բախվել խեթական բանակի հետ, այնուհետ ներխուժել Ծոփք և շարժվել ավելի հյուսիս: Այնտեղից Աշշուրի արքան վերադարձել է Արածանիի ստորին ավազան, հավանաբար Բերդակ-Խարբերդ-Տոմիսա երթուղով հասել Եփրատ, գետանցել այն, ասպատակել խեթական

83 Տե՛ս Քոսյան Ա., Մերձավորարևելյան ճգնաժամը և Հայկական լեռնաշխարհը, էջ 19-20:

84 Տե՛ս նույն տեղում, էջ 75:

85 Տե՛ս նույն տեղում, էջ 205 (ծան. 276):

86 Տե՛ս նույն տեղում, էջ 74-76

87 Տե՛ս նույն տեղում, էջ 19-20:

88 Տե՛ս նույն տեղում, էջ 191 (ծան. 22):

89 Տե՛ս Капанцян Г., Хайаса-колыбель армян, Ереван, 1947, էջ 198-199:

90 Տե՛ս Пиотровский Б., О происхождении армянского народа, Ереван, 1946, էջ 9, 20, 27:

91 Տե՛ս ТУ, էջ 39:

92 Թիգլաթթայասար I-ը Հայկական Տավրոսի այս հատվածը բնորոշում է որպես Արունա լեռներ (АВНИУ, 10 (II, 63, III, 73)), որը նույնական է «Արմե» անվանաձևի հետ:

93 Չի բացառվում, որ ողջ Ալզին՝ շրջակա տարածքներով, մինչև Վանա լճի արևմտյան շրջանները, համապատասխաներ հնագույն Արմանի երկրին, իսկ հետագա շրջանի Արմե, Արունա, Ուրմե, Արամ սեպագրական տեղանունները հանդիսանային նրա ժառանգորդները:

շրջանները⁹⁴: Խեթերը, Ալգիի դաշնակցային ուժերի պարտությունից հետո, փորձել են Իսուվայի հետ համատեղ կասեցնել ասորեստանյան զորքի առաջխաղացումը և թույլ չտալ, որ գետանցեն Եփրատը: Սակայն, Իսուվայի դավաճանության պատճառով, նրանք պարտություն են կրել: Ծոփացիները, կարծեք, գերադասել են իրենց բուն տարածքները փրկել՝ հանձնվելով ասորեստանյան ողորմածությանը:

Մեկ այլ սցենար ևս հնարավոր է: Թուկուլթի-Նինուրտան Մադանի-Մադենից հետո հիշատակում է Նիխանի երկիրը, որը համադրելի է ժամանակակից Նեխրի-Նեխրի բնակավայրին՝ տեղակայված Բալուից հյուսիս-արևելք: Այն հիշեցնում է Նիխրիյա-Նիխրիյահին⁹⁵: Պետք է նկատել, որ ասորեստանյան բանակի և խեթերի միջև ճակատամարտը տեղի է ունեցել ինչ-որ տեղ Ալգիի, Մադանիի, Տերուրգիի, Պուրուլումգիի, Նաիրիի, Իսուվայի և Խաթթի մոտակայքում: Այս տեսանկյունից Նիխանի-Նիխրիյա-Նեխրի համադրումը հավանական է թվում: Հետաքրքիր է, որ Արդանա-Մադեն գավառի Բալու գավառակում, Բալու բնակավայրից հարավ, Բալուի և Մադենի միջև կա Սրին (Սիրին) անունով բնակավայր՝ համանուն լեռնագագաթով⁹⁶: Այն համադրելի է Սուրրա տեղավայրին, որտեղ Նիխրիյայից հետքաշվելով, դիրքավորվել է Թուկուլթի-Նինուրտա I-ի բանակը⁹⁷: Նկատենք նաև, որ Ալգիի իր դաշնակցային ուժերով էր դուրս եկել ասորեստանյան զորքի դեմ, իսկ խեթերը՝ միայնակ, փորձելով ներքաշել Իսուվային: Դա փաստում է, որ Աշշուրի արքան երկու խոշոր ճակատամարտեր է տվել Կատուխիից մինչև Ալայա ընկած հատվածում, այնուհետ շարժվել հյուսիս: Եվ Նիխրիյայի առավել հավանական տեղադրությունը պետք է լինի Ալգիից արևմուտք կամ հյուսիս-արևմուտք՝ Ալգիի և Իսուվայի սահմանների մերձակայքում: Այստեղ խեթական զորքը, Արածանիի ավազանով, հավանաբար շարժվել է դեպի արևելք և փորձել հանկարծակի հարվածով հետ մղել ասորեստանցիներին, սակայն մտահղացումը ձախողվել է: Նիխրիյայի մոտ հաղթելուց հետո ասորեստանյան բանակը խորացել է Իսուվայի տարածք՝ շարժվելով հյուսիս-արևմուտք, հասնելով Դերսիմ և Մնծուր: Շուբարին և Նաիրին հնագանդեցնելուց հետո ասորեստանյան բանակի թիկունքն ապահով էր, և վերադարձի ճանապարհին այն կարող էր գետանցել Եփրատը և ասպատակել խեթական մերձակա շրջանները:

Այսպիսով, Թուկուլթի-Նինուրտա I-ի արշավանքի երթուղին՝ դեպի կուտիների, շուբարեցիների և Նաիրի երկրներ, գծագրվում է բավականին հստակ, փաստելով, որ ասորեստանյան զորքն անցել է պատմական Կորդուքի, Կադմյան Ծավդեքի, Տուր-Արդիի լեռների, Ադանիքի, Արդանա-Մադենի տարածքներով, հասել Բալուի մոտակայք, այնուհետև՝ Դերսիմ և,

94 Լ. Գոլովևան կարծում է, որ Թուկուլթի-Նինուրտա I-ը Տիգրիսի ակունքների շրջանից անցել է Եփրատի ավազան և գետանցել այն՝ առանց Իսուվա-Ծոփք մտնելու. և դա հիմնավորում է՝ այս երկիրը չհիշատակելու փաստով (Головлева Л., Царство Алзи во второй половине II тыс. до н. э., էջ 86 (ծան. 71)): Սակայն բաց է մնում, թե որտեղ էր, այս պարագայում Նաիրին՝ իր 40-43 շրջաններով: Տերուրգի-Դերսիմ համադրությունը և Վերին ծովի բազմակի նշումներն ապացուցում են, որ այս արքան մտել է Իսուվա-Ծոփքի տարածք, գրավել նրա մի քան երկրները, մասնավորապես՝ Տերուրգին և Պուրուլումգին, այնուհետ անցել Նաիրի՝ հասել Եփրատի ավազան և շարժվել ավելի հյուսիս:

95 Այս տեղանունների սմառությունը նկատել է նաև Ս. Երեմյանը, սակայն դրանք համադրել է ժամանակակից Նիխան դաղի հետ՝ Տիգրիսի աջափնյակում (Дьяконов И., ПАИ, էջ 227 (ծան. 96)):

96 Տես ՀՀՇՏԲ, հատ.4, էջ 692:


97 Տես Բոսյան Ա., Մերձավորարևելյան ձգնաժամը և Հայկական լեռնաշխարհը, էջ 205 (ծան. 276):

հավանաբար Արածանիի աջակողմյան վտակ Մնծուրի ավազանով ներխուժել Բարձր Հայքի տարածք, հասել Վերին Եփրատի ավազան, բախվել Նաիրիի արքաներին, հավանաբար հասնելով մինչև Արևելապոտոնական լեռները, իսկ վերադարձին գետանցել է Եփրատը և կրկին բախվել խեթերի հետ: **Ակնհայտորեն, ասորեստանցիները, այս վաղագույն շրջանում Նաիրի էին անվանում խեթական աղբյուրներից հայտնի Հայասա-Ազգի տարածքը՝ ընկած Արևելապոտոնական լեռներից հարավ՝ մինչև Մնծուր, Պաղին, Բալու և Աղձնիք:**

Աշշուրի արքան առնվազն 5 խոշոր ճակատամարտեր է տվել իր անցած ճանապարհին. **առաջինը՝** Յաուրի լեռներում (Կորդուքի հարավային մատույցներում)՝ կուտիական դաշնակցային զորքի դեմ՝ բաղկացած բաբխեցիներից և ուկունանեցիներից, **երկրորդը՝** Ալզիի և նրա դաշնակից շուբաբիական թագավորների դեմ՝ ինչ-որ տեղ Աղձնիքի տարածքում՝ Բշերիկից հյուսիս-արևմուտք կամ արևմուտք՝ մինչև Սաղեն: **Երրորդ** խոշոր ճակատամարտը տեղի է ունեցել խեթերի դեմ՝ Նիխրիայի մոտ, հավանաբար Արածանիի աջափնյակում, Բալուից հյուսիս-արևելք: **Չորրորդ** ճակատամարտը տեղի է ունեցել Նաիրիի 40 կամ 43 արքաներից բաղկացած դաշնակցային զորքի դեմ՝ Եփրատի ավազանում, Մնծուրյան լեռները հաղթահարելուց հետո, հավանաբար Երզնկայի մոտակայքում: **Հինգերորդ** ճակատամարտը տեղի է ունեցել Եփրատի աջափնյակում, հավանաբար Կոմնագենեի տարածքում, որի արդյունքում խեթերի կազմալուծված ուժերն ուղղակի գերեվարվել են:

Ասորեստանյան այս աննախադեպ արշավանքն ուներ ռազմաքաղաքական և տնտեսական մեծ նշանակություն: Ըստ էության Միտանիի ժառանգության համար խեթերի հետ ընթացող շուրջ մեկդարյա պայքարն ավարտվեց Ասորեստանի հաղթանակով: Թուկուլթի-Նինուրտա I-ը հսկողություն հաստատեց Կորդուքի շինանյութերով հարուստ շրջանների, Մոկքի, Արդանա-Սաղենի, Դերսիմի, գուցե և Գյումուշխանեի հարուստ մետաղական հանքավայրերի նկատմամբ: Սակայն հաջողությունները ժամանակավոր բնույթ էին կրում. Հայկական լեռնաշխարհի հնագույն տերերն ամենևին էլ հլու-հնազանդ չէին Խաթթիի և Աշշուրի տիրակալներին, և վերջիններս, մինչև Ուրարտուի կազմավորումն ու դրանից հետո, դեռ բազում անգամներ պետք է մագլցեին հայոց լեռները՝ փորձելով տիրել նրա հարստություններին:

Արտակ Ս. Սարգսյան – հեղինակ է 7 գիտական գեկույցների և թեզիսների, 2 գիտական հոդվածների: Գիտական հետաքրքրությունների շրջանակում են՝ հայոց պատմության հնագույն շրջանը, սեպագրական աղբյուրներում հիշատակվող Հայկական լեռնաշխարհի տեղավայրերի և Ք. ա. II-I հազարամյակի ասորեստանյան արքաների՝ դեպի Հայկական լեռնաշխարհ կատարած արշավանքների երթուղիների ուսումնասիրությունը:



Summary

CAMPAIGN OF ASSYRIAN KING TUKULTI-NINURTA I (1243-1207 BC) KUTI, ŠUBARI AND NAIRI

Artak S. Sargsyan

Key words – Countries of Nairi, country of Kutu, country of Šubari, battle of Nihriya, Katmuhi (Kadmian Tsavdek), Alzi-Agdznik, Teburzi-Dersim, Hayasa-Azzi, mountains of Muzur, basin of the Euphrates, Makan (Magnana, Machkan), Upper Sea, Musru-Arinni (Mijas, Arin).

The article explored the route of the campaign of Aššur king Tukulti-Ninurta I, in the first year of his rule, on Kutu, Šubari and Nairi. As a result, it was found that the Assyrian army reached Korduk, through the basin of the Great Zab or the Tigris, and captured the Kutians countries Ukumani (surroundings of Komana and Gefshe), Mehri (Mehri Nar), Šarnida (Shirnak or Shahidinan), Elhunia (Eruh) and Babhi (area of Tigers merger). Then the army of Aššur passed the Šubarians countries Katmuhi (Kadmian Tsavdek), Kašiiari mountainous region (Tour-Abdin), Mummi (Maymunik), Bušše (Bsherik), Alzi (Agdznik), Madani (Maden), Surra (Siri, between Maden and Balu), Nihani (Nexri, north-east of Balu), Alaia (Alevor, north-east of Hozat), Teburzi (Dersim), Purulumzi (in the basins of the Pahin and Mzur rivers)) and captured the great sanctuary Purulumzi (possibly Kamah). Then the Assyrians reached the Upper Euphrates, between Kamah and Erznka, and entered into Nairi. There they faced 40 (43) kings of Nairi, reached the southern border of the country Makan (comparable to ant. Magnana, mod. Machkan), located on the shores of the Upper Sea (Black Sea) – between Trabzon and Gyu-mushkhane. In the country of Nairi, the Assyrians also occupied the Azalzi (probably Ariza-Eriza-Erznka) and Šepardi countries. On the way back, they probably crossed the Euphrates near Tommisa, entered Kommagene, captured about thirty thousand Hittite soldiers and returned to Assyria. It is obvious that the Assyrians, in this early period, under the “countries of Nairi” meant the territory of Hayasa-Azzi, known from Hittite sources, located in the south of the East-Pontian mountains, towards Mzura, Pahin, Palu and Agdznik. King Aššur on the path of the parokha gave at least five major battles—the first, in the mountains of Iauri (on the southern slopes of Korduk), against the allied forces of the kutians, the second against Alzi, and the allied forces of the Šubarian kings (somewhere in Agdznik, north-west or west of Bsherik, between him and Maden). The third major battle took place near Nihriya, probably on Nfrkert or on the right bank of the Aratsani, north-east of Balu (near Nexri): The fourth battle took place against the allied forces of Nairi, in the Upper Euphrates basin, probably after overcoming the mountains of Mndzur, possibly, near Erznka. The fifth collision occurred again with the Hittites, on the right bank of the Euphrates, probably in the Kommagene area.

This unprecedented Assyrian invasion had great military-political and economic significance. Tukulti-Ninurta I temporarily controlled the districts of Kor-duk, Moks (Musru-Arinni), Arghana-Maden, Dersim and, possibly, Gumushkane-territory with rich construction materials and metal mines.

Резюме

ПОХОД АССИРИЙСКОГО ЦАРЯ ТУКУЛТИ-НИНУРТЫ I (1243-1207 ГГ. ДО Р.Х.) НА КУТИ, ШУБАРИ И НАИРИ

Артак С. Саргсян

Ключевые слова – страны Наири, страна Кути, страна Шубари, сражения Нихрии, Катмухи (Кадмийский Цавдек), Алзи-Агдзник, Тебурзи-Дерсим, Хайаса-Аззи, горы Музур, бассейн Евфрата, Макан (Магнана, Мачкан), Верхнее море, Мусру-Аринни (Миджас, Арин).

В статье исследован маршрут похода царя Ашшура Тукулти-Нинурты I на Кути, Шубари и Наири в первый год его правления. В результате было выяснено, что ассирийская армия дошла до Кордука через бассейн Большого Заба или Тигра и захватила кутийские страны Укумани (окрестности Команы и Гефше), Мехри (Мехри Нар), Шарнида (Ширнак или Шахидинан), Элхуния (Эрух) и Бабхи (район слияния Тигров). Потом армия Ашшура перешла через шубарейские страны Катмухи (Кадмийский Цавдек), горную область Кашияри (Тур-Абдин), Мумми (Маймуник), Бушше (Бшерик), Алзи (Агдзник), Мадани (Маден), Сурра (Сири, между Маденом и Балугу), Нихани (Нехри, к северо-востоку от Балугу), Алайа (Алевор, к северо-востоку от Хозат), Тебурзи (Дерсим), Пурулумзи (в бассейнах рек Пахин и Мзур)) и захватила большое святилище Пурулумзи (возможно, Камах). После чего ассирийцы дошли до Верхнего Евфрата между Камахом и Ерзнкой и вошли в Наири. Там они столкнулись с 40 (43) царями Наири, достигли до южной границы страны Макан (сравнимо с антич. Магнана, совр. Мачкан), расположенной на берегу Верхнего моря (Черное море) между Трабзоном и Гюмушханой. В стране Наири ассирийцы также оккупировали страны Азалзи (наверно Ариза-Ериза-Ерзнка) и Шепарди. На обратном пути они, вероятно, пересекли Евфрат возле Томмисы, вошли на территорию Коммагене, захватили около тридцати тысяч хеттских солдат и вернулись в Ассирию. Очевидно, что ассирийцы в этот ранний период под «странами Наири» имели в виду территорию Хайаса-Аззи, известной из хеттских источников, расположенной к югу от Восточно-Понтийских гор до Мзура, Пахина, Палу и Агдзника. Король Ашшура в ходе похода дал по крайней мере пять крупных сражений: первое – в горах Яури (на южных склонах Кордука) против союзных войск кутиев, второе – против Алзи и союзных войск шубарейских царей (где-то в Агдзнике, северо-западнее или западнее от Бшерики, между ним и Маденом). Третья крупная битва произошла возле Нихрии, вероятно,

под Нфркертом или на правом берегу Арацани, к северо-востоку от Балы (недалеко от Нехри). Четвертая битва была против союзных войск Наири в бассейне Верхнего Евфрата, вероятно, после преодоления гор Мндзура, возможно, возле Ерзнка. Пятое столкновение снова произошло с хеттами на правом берегу Евфрата, вероятно, в районе Коммагене.

Это беспрецедентное ассирийское вторжение имело большое военно-политическое и экономическое значение. Тукулти-Нинурта I временно контролировал районы Кордука, Мокса (Мусру-Аринни), Аргана-Мадена, Дертсима и, возможно, Гюмушханы – территории, богатые строительными материалами и металлическими рудниками.

REFERENCES

1. **Adonc N.**, Hayastani patmutiun, Ye'r., 1972 **(in Armenian)**.
2. **Adonc N.**, Hayastany Hustinianotsi darashrdganum, Ye'r., 1987 **(in Armenian)**.
3. **Arutjunjan N.**, Biainili(Urartu), Ye'r., 1970 **(in Russian)**.
4. **Arutjunjan N.**, Toponimika Urartu(TU), Ye'r., 1985 **(in Russian)**.
5. **Djakonov I.**, Assiro-vavilonskie istochniki po istorii Urartu (AVIUI), VDI, N2, 1951 **(in Russian)**.
6. **Djakonov I.**, Predistoria armjanskogo naroda, (PAN), Ye'r., Izdatelstvo AN Armianskoi SSP, 1968 **(in Russian)**.
7. Hay jogh'ovrdi parmutiun, hat. 1, (HJP), pat. xmb. S. Yeremyan, Ye'r., 1971 **(in Armenian)**.
8. Hay joghovrdi patmutiuan qrestomatia, hat. 1, (HJPQ), Ye'r., 1981 **(in Armenian)**.
9. Hayastani yev' harakic sh'rjanneri tegh'anunneri bararan (HHSHTB), hat. 1-4, 1986-1998 **(in Armenian)**.
10. **Golovleva L.**, Carstvo Alzi vo vtoroj polovine II tys. do. n. e., Drevnii vostok, Ye'r., 1978, N3, eg 71-87 **(in Russian)**.
11. **Kapancjan G.**, Xajasa-kolybel armjan, Ye'r., 1947 **(in Russian)**.
12. **Manandjan Y.**, O nekotoryx problemax istorii i geografii drevnei Armenii, Ye'r., 1956 **(in Russian)**:
13. **Melikishvili G.**, Nairi-Urartu, (N-U), Tbilisi, 1954 **(in Russian)**.
14. **Melikishvili G.**, Urartskie klinoobraznie nadpisi, (UKN), Moskva, 1960 **(in Russian)**.
15. **Movsisyan A.**, Barepash't arqaneri ashxarhahalutyunə, Ye'r., 1997 **(in Armenian)**.
16. **Movsisyan A.**, Hayastanə Qristosic araj errord hazaramyakum, Ye'r., 2005 **(in Armenian)**.
17. **Piotrovskij B.**, O proisxozhdenii armjanskogo naroda, Ye'r., 1946 **(in Russian)**:
18. **Qosyan A.**, Asorestanə yev Haykakan lernashxarhi erknerə m.t.a. XIII dari erkrord kesin, Patma-banasirakan handes, 2-3, Ye'r., 1999, ej 222-231 **(in Armenian)**.
19. **Qosyan A.**, Merdz'avorarevelyan c"gnajamə yev' Haykakan lernashxarhə, Ye'r., 1999 **(in Armenian)**.
20. **Sargsyan A.**, Ardini-Musasiri tegh'oroshman shurdg, MMAEJ, XIX, Ye'r., 2000, 140-152 **(in Armenian)**.
21. **Sargsyan A.**, T'iglat'palasar I-i m.t'.a. 1112 t'. Nairyan arsh'avanqi ertujh'in, Patma-banasirakan handes, PBH, 2002, 3(161), ej 215-224 **(in Armenian)**.
22. **Sargsyan D.**, Daiaeni-Diauxi petutyun gravac' taratsqy ev bnakchutyun haykakan tsagumy, "Lraber hasarakakan gitutyunneri", Ye'r., 2003, N2, ej 168-170 **(in Armenian)**.

23. Xachatrjan V., Xaijastsi, “Lraber”, Ye'r., 1972, N8, ej 31-41 **(in Russian)**.
24. Xachatrjan V., Xaijasa i Nairi, HSSH GA “Lraber”, Ye'r., 1973, N11, ej 37-47 **(in Russian)**.
25. Xachatrjan V., Nairi i Armenia, “Lraber hasarakakan gitutiunneri”, Ye'r., 1976, 8(59). ej 59-72 **(in Russian)**.
26. Xachatrjan V., Hajastany m.t.a. XV-VII darerum (Hayots hin patmutjun), Ye'r., 1998, ej 81-83 **(in Armenian)**.

ՔՆՆԱՐԳՈՒՄՆԵՐ

ԺԱ (ԺԷ) ԳԱՐԻ, ԹԻՎ 2 (66), ԱՍՐԻԼ-ԽՈՒՆԻՍ, 2019

ՎԼՎ ԽԱՄԱՆԽԱՅԼԻԿԱԿԱՆ ԽԱՆՐԵԼԱ